

東
華
續
錄

東華續錄

咸豐六十一年

臣王先謙敬編

臣陶澐宣恭校

六月丙戌朔向榮福興彭玉雯奏逆匪自攻陷溧水後經臣向榮派張國樑帶兵馳往溧水會同明安泰剿辦其時鎮江竄回大股之賊於太平神策各門分股屯踞五月十五日先由龍脖子出賊數千窺伺前敵各營並在大小水關一帶築壘當派副將王浚等分路進攻將賊擊敗復有上游賊眾二萬從蕪湖金柱關一帶陸續竄回金陵屯踞北鄉與大水關之賊聯絡並於黃馬羣路口添築二壘當飭張國樑抽帶兵勇趕回大營一面札飭總兵虎嵩林遊擊張玉良等各調兵勇均赴大營策應並密飭都司馮子材帶廣勇五百名潛赴黃馬羣地方將該逆新壘焚毀斬殺二百餘人

十七日逆匪四五百人直撲仙鶴門營盤王浚李定太李若珠等整隊迎勦該逆復突出數千分股包鈔我軍眾寡懸殊旋戰旋退該匪卽乘勢攻撲將仙鶴門營盤圍困臣復抽派兵勇交遊擊李鴻勳帶往援勦該逆始行退去臣福興以賊勢過眾親往青馬羣地方連夜趕修營盤堵其內竄詎該逆分十數股來撲張國樑督率兵勇奮擊斃賊數百名忽紫金山賊股撲犯山腳營盤南門及通濟門又出賊數千直撲七橋窰捷勇營盤該勇存營不及三百其勢甚危臣向榮親統官兵策應併力截殺我兵無不以一當百斃賊甚多戰至午時張國樑一軍火藥鉛彈俱盡該逆抵死不退張國樑匹馬衝殺立砍黃衣賊首三人副都統德崇額槍斃悍賊多名適另股四五百人翻山圍撲馬隊營盤縱火焚燒以致各營相繼失陷逆眾數萬卽圍撲大營其時徧地皆賊我軍於賊隊之

中往來鏖戰斃賊不下數千人張國棟直衝賊隊左腳被槍子打傷仍復拌命力戰參將陳明志都司戴文英李振甲劉秀珠等均不知下落兵勇傷亡亦不下千餘人該逆復分股至小水關高橋門一帶查高橋門爲大營後路萬一被賊占踞則我兵腹背受敵營盤旣失止得將全軍退至清化鎮整隊扼守臣軍兵力本單今因連日苦戰死傷不少必須整頓休息調集兵力方可再圖進剿惟該逆人數旣眾久已垂涎蘇常設再竄至句丹乘勢內犯則大局不堪設想臣等以丹陽爲內竄要道情形喫重卽令拔隊分起馳赴丹陽將城守一切布置設防並於城外擇地趕築營盤俾資戰守一面將秣陵關一軍調至溧陽歸總兵明安泰調遣併力防堵以扼內犯之路並將石埠橋樓霞仙鶴門各軍卽令總兵德安帶赴白土一帶防守句容原設兵勇一千二百名今於丹陽抽撥

勇壯一千五百名前往協同防守以期保固東南大局惟臣等日久無功今復失營盤失陷請旨將臣從重治罪以儆戎行上諭軍機大臣等本日據向榮等奏逆眾撲陷營盤官軍退守丹陽一摺覽奏實深憤懣上下游援賊糾合金陵逆眾數萬於神策太平門外屯踞圍撲我軍營盤因眾寡不敵以致失陷退守丹陽此時賊勢猖獗已極向榮等遇其內犯固爲保全大局起見尤應重整兵威力圖進剿藉以牽制賊勢若僅株守丹陽一蹶不能復振則該逆愈無顧忌況甯國溧水尙爲賊踞內犯之路不止一處更恐顧此失彼已有旨令怡良趙德轍激勵鄉團協同堵剿並設法接濟軍餉該大臣等營壘已定務當奮力出剿以冀轉敗爲功庶可稍贖前罪見在江南大兵已撤逆賊無所顧忌江北情形亦極喫重前調河南防剿之陝西綠營官兵一千名本赴向榮軍營今已

諭令英桂調赴揚州交德興阿等相機布置如江北兵力足敷攻
剿而江南尙在需兵再行調往向榮軍營其黑龍江餘丁五百名
到揚後卽交德興阿等調遣向榮見駐丹陽距大江已在百里以
外所有紅單各船恐難兼顧著德興阿會同書余萬清分飭上游
各船攻剿觀音門一帶賊船下游各船攻打瓜州金山等處以分
賊勢使不得全力內犯亦不敢分股北竄俟向榮統兵前進重整
軍威仍卽南北聯絡再籌剿辦之方今當官兵新挫逆燄方張該
大臣等務須同心協力謀勇兼施冀早挽回大局以慰朕懷所有
紅單船餉稍已諭令怡良等力籌接濟矣將此由六百里加緊各
諭令知之○諭前因金陵逆匪併力內犯疊諭怡良等實力防堵
接濟軍餉本日據向榮馳奏上下游大股援賊踵至糾合金陵逆
眾數萬圍撲大營我軍竭力抵禦因眾寡不敵營盤相繼失陷見

在收集各軍扼守丹陽等語賊勢猖獗蘇常情形更屬萬分喫緊
怡良總督全省責無旁貸著卽妥籌布置仍遵照前旨迅飭宜興
荆溪各處地方文武嚴密防範並通飭蘇常各屬查拏奸細毋令
勾結貽患至沿江陸兵已全行撤退惟畱紅單船分泊太江南北
尙可牽制賊勢而向榮退至丹陽距江已遠難以調度見已諭令
德興阿余萬清分飭各船於江面助剿使金陵賊逆有所顧忌所
需軍餉並著怡良等籌畫接濟毋使缺乏見在向榮軍營兵力甚
單趙德轍曾任江南府知府熟悉金陵民情如能將秣陵閭閻化
鎮一帶民團聯給以輔兵力之不足該署撫卽可出省爲向榮後
路援應該民團果能奮勇立功卽著奏請優獎朕必破格施恩以
收眾志成城之效著趙德轍酌度情形相機妥辦將此由六百里
加緊各諭令知之○諭本日向榮等奏上下游大股援賊糾合金

陵賊匪圍撲我營該大臣因兵分力單營盤被陷退扼丹陽以遏
內犯蘇常情形更爲喫重卽江北一帶亦恐逆匪生心北竄前諭
英桂調赴金陵之陝西綠營兵一千名已據該撫奏籌給軍裝飭
遊擊興貴等帶由永城前往見在向榮已移紮丹陽著英桂飛飭
該遊擊將此項官兵改赴揚州德興阿軍營聽候該大臣調撥其
黑龍江馬隊餘丁五百名亦已諭令全數撥往揚州並著英桂迅
卽飭令啟程勿再延誤雉河集擒匪老巢旣經袁甲三等攻破其
餘各股擒黨當必聞風解散英桂已赴亳州務卽剋期將餘匪殲
勦淨盡卽可調此得勝兵勇赴江南協勦以遏賊氛將此由六百
里加緊諭令知之○向榮等奏金陵逆匪糾眾撲陷營盤自請從
重治罪得旨向榮久歷戎行素諳機宜雖賊數過多而悍何至如
此大挫一再敗退展布全無殊屬孤恩之至著奮勉以補前愆趁

此梟獍萃集未必不轉好機會爾若遽存拏問發遣以遂脫離之心是真喪良也料爾或不出此○以金陵軍營失利欽差大臣湖北提督向榮幫辦軍務西安將軍福興均革職拔去花翎仍畱任○貸福建提標五營及泉州城守營兵丁穀價銀○丁亥諭軍機大臣等蔣霽遠奏請飭催廣東應解黔餉並將川省赴黔官兵糧餉由川續撥各等語廣東省指撥貴州兵餉疊經降旨飭催據該督撫奏報按每批五萬兩業已先後起解猶恐該省道路遙遠復諭令黃宗漢於四川先行籌解再由廣東解還是此項銀兩已可源源接濟勿庸再事飭催至川省官兵赴黔協剿本省裹帶之糧業已籌至六月亦不爲少況陝西欠解黔餉亦經諭令黃宗漢先行籌墊若再責令自備兵糧是四川一省既爲貴州墊他省之款又爲貴州協進剿之兵恐難兼顧以本省應辦之事而全數仰給

於鄰疆雖黔餉支絀部撥尙謂不足耶似此小醜跳梁藏功無日
老師糜餉伊於胡底試問該撫身任封圻所司何事乃竟一籌莫
展過分彼此豫存成見至於若是著黃宗漢仍遵前旨將代墊陝
西廣東等省銀兩陸續分起迅速解黔以資應用此項銀兩解到
後無論川兵黔兵皆可通融支應原不應區分畛域蔣蔚遠仍當
嚴督在事文武迅將苗匪剋日蕩平不得徒以餉匱爲詞束手無
策將此由五百里各諭令知之○諭蔣蔚遠奏請由湖南採辦米
糧就近運交鎮遠糧臺轉運行營一摺滇黔兵勇較多見在匪蹤
未清糧米難於採辦自係實在情形著駱秉章卽飭辰沅等府就
近採買米糧三萬石迅卽派員運赴鎮遠糧臺以資支放所需米
價運費卽在湖南續收咸豐五年漕米變價項下應解貴州軍餉
五萬兩內動支扣算毋稍稽延將此由五百里諭令知之○戊子

諭軍機大臣等前因通政司參議曾望顏奏請雇火輪船以清江面當經諭令向榮等籌商具奏嗣據向榮等覆奏以紅單船已足制賊雇募夷船入江易滋流弊已如所議停止茲據宗人府府丞宋晉奏江南情形危急請飭護送海運之火輪船由圖山關入江焚攻金焦一帶賊船先將瓜州攻克再由儀徵而溯浦口力剿北岸賊匪與六合諸軍犄角則可解江南之急而江北亦就肅清其紅單船一項請無庸分撥應令併歸一處乘此夏令風順將蕪湖攻克則甯國亦不攻自退等語所奏不爲無見此項護送海運之火輪船前據向榮等奏俟護運事竣飭調入江助剿見在護送海運業已竣事火輪船入江之舉正在此時著怡良趙德轍何桂清卽行飭知帶船各員迅由圖山關入江會同紅單各船聽候向榮德興阿等調度又另片奏請再行多雇輪船並責成道員繆梓楊

裕深金安清辦理雇船事宜等語護送輪船僅止二隻爲數本少若再行多雇既恐需費不貲又恐入江後船大難於駕駛前此李泰國呈報有新製小火輪船之語如能添購數隻較之大號輪船行駛更當便捷著怡良等妥速會商如事屬可行須由內地官紳管帶應需經費並著該督撫等妥爲籌畫迅速奏聞其繆梓等三員能否前往上海甯波等處辦理船隻並著何桂清酌度具奏至紅單船昨因向榮一軍距大江較遠諭令德興阿等就近調度本日據德興阿等奏攻擊金山情形似亦可牽掣賊勢見在金陵既無大軍鎮壓該逆勢必更肆猖獗南北沿江處所在在堪虞如得火輪船協同紅單船上下游往來攻剿以挫兇鋒尙可牽制賊眾使不敢深入紛竄該大臣等著卽妥爲布置以速爲貴至水師無陸兵相輔而行亦恐勢成孤立向榮德興阿余萬清各營能否抽

兵相助並著會商妥辦將此由六百里諭知向榮德興阿怡良趙德轍何桂清並諭福興余萬清翁同書知之○和春等奏穎壽剿擒獲勝情形得旨辦理頗屬得手另片奏協力守城亦係蔡昌言之功該參將甚爲出色○德興阿等奏攻剿金山瓜州賊匪情形得旨南軍失利雖會攻金山未必得手然正可牽制逆匪北犯○命前任福建按察使徐宗幹幫辦安徽防剿事宜○辛卯諭內閣崇恩奏海運漕船被劫等語本年海運南來有金天來漕船一隻行至山東石島洋面被匪船劫去銀物擄去舵工一名雖漕米並未損失惟該管水師將弁未能先事防範實屬疏忽著查明專巡各該將弁嚴行奏參以示懲儆並督飭水師鎮將嚴緝盜匪務獲懲辦仍令實力巡查防護漕船毋得再有疏懈○諭扎拉芬泰等奏官兵廉俸餉銀請仍按三成開放等語前因各直省文武養廉

減成支放恐致辦公拮据令戶部議增成數以示體恤茲據該將軍等奏伊犁協餉未充仍擬照前籌節所有各營兵丁餉銀著暫按三成發給俟甘肅協餉稍充再由該將軍等隨時酌量加增藉資當差其伊犁各官養廉著自本年秋季爲始按照三成支領俟軍務告竣再照舊例如數發給○諭軍機大臣等前因金陵賊勢猖獗諭令和春等派兵攻其所必救以分賊勢本日據該提督等奏稱官兵圍剿三河無可分撥僅派馬步兵四百餘名赴金陵協剿自係爲皖省防剿緊要起見惟自向榮退守丹陽後金陵一帶陸路無兵逆匪愈肆鴟張和春等既未能派一旅之師出奇截擊而據稱裕溪運漕之間添賊萬餘巢湖有賊船數百隻往來接應又在巢縣製造數千快槳實屬防不勝防等語殊堪詫異巢湖密邇廬州巢縣本有官兵攻剿何以任聽該逆聚眾萬人在彼製造

船隻且至數千之多一旦駛下長江爲患不可勝言該提督等何
竟不知思患豫防著卽督飭員弁迅將逆船設法焚毀毋得養癰
貽患日後儻有快槳賊船駛至大江及由小口竄入下游腹地者
惟和春福濟是問前因福濟患病賞假調理並派徐宗幹前往幫
同辦理徐宗幹於皖省情形究未熟悉和春等可酌量委辦事件
福濟卽日病痊所有應辦軍務仍著會同和春悉心籌畫認真督
辦毋得稍存推諉致負委任將此由六百里諭令知之○癸巳向
榮奏查丹陽地方一走新豐至丹徒鎮一走馬陵至甘棠橋一通
楂樹岡均係通鎮之路一由白兔一由句容均可直達金陵此外
尙有小道可通金陵鎮江者實爲蘇杭緊要門戶臣已飭總兵張
國樑虎嵩林等連日於城內外布置設防凡扼要處所均已完築
營盤日來軍心稍定辦理已有端倪惟句容地勢散漫必須多設

兵力臣復於丹陽調撥兵勇二千名令副將西林馳往統率防堵其溧水之賊經總兵明安泰於十七日進攻頗有斬獲臣見飭令管帶兵勇馳赴溧陽會同署總兵江長貴將溧陽金壇東壩內犯之路扼截仍相機進剿溧水之賊其白兔寶堰地方亦爲內犯之路臣已酌派兵勇前往駐紮並將寶堰船隻一律驅逐不准停泊至石埠橋棲霞一軍經總兵德安於五月十六七八等日出隊救援仙鶴門營盤與候補副將巴圖督兵禦敵鏖戰三晝夜斃賊數百因該逆愈來愈多我兵相持至十九日早衝圍而出副將巴圖千總朱得隆奮勇殺賊力竭陣亡都司姚爵階身受多傷兵勇傷亡不少德安收集潰兵均已陸續來丹勉爲休息連日探得金陵逆眾分股逼近句容一帶焚掠兵勇新挫之餘誠恐難資守禦茲復派李志和統帶勇丁五百餘名馳往堵剿見在丹陽兵勇陸續

到齊已令總兵張國樑總統諸軍挑選精銳汰除疲弱並催調軍械以資戰守惟臣營兵勇原有一萬六七千自抵金陵以來分調各處不下萬餘存營不及五千見雖有福建漳泉兵勇三千名及歸德軍營陝甘兵一千名赴調前來而賊勢鴟張官軍挫衄加以轉戰頻年疲病傷亡亦復不少實屬不敷堵剿惟有仰懇 天恩飭廣東督撫挑選得力精兵四千名多配擡槍烏槍令提鎮大員統帶兼程前來助剿或由海船前來更爲迅速至廣東陸路提臣崑壽總兵通安參將梁顯揚衛佐邦聞皆久經戰陣熟悉賊情請飭令酌派統兵前來更資臂助至前在金陵力戰陣亡之廣東雷州營參將陳明志貴州古州鎮都司李發榮永安協都司劉秀珠四川川北都司李振甲候補副將巴圖廣西提標千總儘先守備朱得隆並巴圖之子馬甲恩明隨營書識山東棲霞縣僧生郝聯

蕙候補守備張德祿均請飭部照應得升階加等議卹其餘陣亡
兵弁暨不知下落各員弁俟查明另行辦理 上諭軍機大臣等
丹陽地方爲蘇杭緊要門戶我兵業已挖築營盤收集兵勇甯國
溧水尙未克復而句容又被賊陷內犯之路幾不勝防該大臣於
丹陽一帶布置既定仍當激勵弁兵以剿爲防毋得株守一隅以
致鞭長莫及難資控馭更有意外之虞將此由六百里加緊諭令
知之○諭向榮所統兵勇前因分援鎮江徽甯等處抽撥過多存
營不滿五千適值金陵各路梟獍紛集致眾寡不敵紫金山大營
失陷弁兵傷亡不少該大臣退紮丹陽爲保守蘇常之計而溧水
句容復先後被踞該逆意在內犯恐兵單不敷堵剿著葉名琛柏
貴於廣東各標營中挑選得力精兵四千名多備糧槍鳥槍兼程
前赴江南助剿如能由海道行走較之陸路更爲妥速著葉名琛

等迅速查商辦理至統兵大員向榮擬請飭令提督崑壽總兵通
安及參將梁顯揚衛佐邦等帶兵前往見在廣東各路漸次廓清
能否卽令該提鎮等前往丹陽之處並著葉名琛酌量調派迅速
奏聞將此由六百里諭令知之○予江南陣亡副將巴圖等祭葬
世職○葉爾羌參贊大臣常清等奏巴爾楚克新墾荒地十一頃
四十畝有奇下部知之○甲午和春福濟奏據侍衛多慧稟五月
二十二日各股捻匪馬步三四千人直撲潁上縣城對城開礮經
我軍擊退賊往西南竄走正擬截擊該逆六七千人並騎馬賊五
六百名復偪縣城我軍槍礮齊施擊斃數十名賊始卻退仍在附
近窺伺該侍衛抽撥練勇派守備陳廣譽管帶由正陽向西橫截
並飭蔡昌言等察看形勢內外夾攻又據鄭魁士咨稱已派勁旅
一千餘名令遊擊俞應彪管帶馳赴潁上並飛咨珠克登等帶兵

會勦等因查額上股匪奔竄靡常見在張落刑被勦窮蹙難保不
在其內亟應合兵勦辦以冀擒渠其著名擒首龔得見據署蒙城
縣知縣俞樹稟稱已爲投城之曹夢林用刀砍傷龔得受傷之後
是否殞命臣等已飭詳查具報得旨龔得雖已受傷不可便存大
意著名擒首或設法離開或懸賞購綫務期殲除淨盡○乙未諭
內閣邵連科等奏勦辦臺灣各案游匪一律肅清請將出力官紳
酌保等語咸豐三年十二月間彰化縣屬漳泉匪黨構釁焚掠均
經該鎮道等督兵彈壓曉諭解散並將淡水拒捕之匪徒痛加勦
洗陸續擊獲首從各犯二百十八名閏七月間復有內地小刀會
匪船竄入雞籠地方經官兵五路進攻殲擒二百三十餘名截殺
百餘名其逃入船中之賊復被水師於臺澎洋面擊沈匪船多隻
擒斬無算五年七月間斗六門匪徒林房等戕官謀逆經官兵迅

往掩捕殲擒淨盡十月間復有鳳山縣匪徒王辦等在崗山地方聚眾豎旗經各路兵勇併力圍攻生擒偽元帥陳子仲等九名並先後擊獲逆首王辦等四十四名見在臺灣南北兩路悉臻安靜洋面一律肅清所有在事出力官紳自應量予鼓勵著准其擇尤保奏候朕施恩○諭軍機大臣等前因江西吉贛一帶與本省道路梗阻屢經諭令葉名琛等調兵五六十名交提督崑壽統帶前赴贛州援剿嗣聞該督等奏報於未奉諭旨之先已派總兵壽山帶兵一千五百名從九品孫福同等帶勇一千八百名越境赴援復批令該督等將崑壽應否暫緩前往之處斟酌速奏本日據曾國藩文俊奏贛州道途久梗請飭廣東先撥兵勇一二千名星速踰嶺先據上游力保贛州再圖進援吉安等語自係未知粵省業已調兵此時江西南路專待援於廣東必應如前降諭旨全數派

往方資得力惟見在江南情形萬分緊急昨諭該督等撥兵四千
名兼程赴援並酌量調派崑壽等統帶前往亦屬刻不可緩恐粵
省兵力不敷所請派援江西之兵業經撥往三千餘名此外如尙
未啟程卽著暫緩先將向榮所調四千名飭令迅赴江南毋稍耽
延此兩路兵勇派出之後如果粵省兵力尙敷調派仍著續行調
赴江西補足原調五千名之數以期得力將此由六百里諭令
知之○曾國藩等奏水師克復豐城懇請酌保數員得旨賊先竄
出焉得謂之克復姑念其打仗奮勇著准其酌保數人○賞惠親
王子奕詳雙眼花翎奕詢奕謨花翎○以攻剿江西饒州賊匪獲
勝賞都司畢金科巴圖魯名號○丁酉諭軍機大臣等勝保奏西
甯甯夏等處兵丁因請餉滋鬧蘭州省城復有兵眾圍繞總督衙
署打碎藩司段大章知府劉仲珪肩輿之事並漢回匪黨於關內

外搶劫或假冒野番或勾結番匪行旅爲之裹足甚至餉銀奏摺均被搶掠請飭整頓等語甘肅省地處邊陲凡約束兵丁防範番匪在在均關緊要前據易棠奏稱西南鎮標兵丁因餉銀改發糧石聚眾鬧設法解散各州縣兵丁亦多恃眾要求請發銀兩抗不領糧亦經地方官調劑息事見據勝保所奏情形該兵丁等尤屬兇橫何以未見該督奏聞甘肅餉銀雖山西等省陸續撥解不能足數所有各營兵丁易棠仍須督飭將弁設法駕馭妥爲約束毋令習成藐玩致生事端尤不可苟且目前彌縫了事至番賊搶劫餉銀奏摺雖經易棠具奏惟是否漢回匪徒假冒野番抑係勾結番賊入卡搶掠必當嚴行查辦以靖地方斷不可養癰貽患自干咎戾著易棠據實覆奏將此諭令知之尋奏本省因庫款支絀以糧抵餉甯夏各營兵丁懇求仍發銀兩經地方官解散並未滋

事又出征兵丁數十人向藩司求發卹賞銀兩亦經臬司曉諭解散尙無兇橫情形至春間玉門縣地方疏失餉鞘摺包之案經提臣索文擎獲隨賊番子訊明實係四川松潘廳之果洛克土番勾結肅州熟番行劫當卽移咨提臣帶兵赴西甯會同辦事大臣協力剿捕報聞○諭前因黑龍江餘丁五百名在毫剿辦捻匪未便撤動諭令邵燦等將畱徐之吉林餘丁五百名飭赴揚州德興阿軍營嗣據邵燦等以徐軍單弱難以抽撥因於河南派赴宿州之西安馬隊一千名內改撥五百名赴揚助剿本日據德興阿等奏南岸賊黨陸續過江亟圖北竄正須勁兵助剿以固清淮門戶仍請將前調黑龍江餘丁五百名飭令迅速來揚藉資利用等語此項餘丁本日據英桂奏稱趕緊調回全數撥赴揚州飭令迅速啟程計不日卽可抵清江著邵燦庚長仍遵前旨迅速飭令全數赴

德興阿軍營以資攻剿毋許截留致有貽誤將此由六百里諭令知之○河南巡撫英桂奏臣於五月二十八日行抵亳州查擒匪自雉河敗竄餘匪三百餘人在西洋集暫息臣飭馬隊往剿該匪聞風先遁潛竄蒙城維時珠克登郝光甲等尙未到蒙該處無兵堵截張落刑等知豫省追兵將至復於蒙城以南之郭家集等處沿途裹脅並勾結該處土匪約千餘人經袁甲三飭派馬步兵勇分路緊追該匪不敢接戰直往東南奔竄官兵窮追百餘里由蒙境直抵阜境該處久被焚掠覓食維難孤軍遠涉飢乏堪虞且連日大雨積潦滿途不得不暫行收隊旋據署潁州府知府袁太華等稟報捻眾由該郡之江口新集一帶渡過沙河勾結焚搶臣復添派馬隊千餘名由佐領松志等營帶並派知縣張學醇等帶領壯勇星馳前往維時准珠克登郝光甲函稱已於五月二十一日

移紮蒙城卽飭該鎮等迅速帶兵前往潁州潁上援剿並因宿州已無匪蹤傳振邦駐紮臨渙亦飭督兵前往與豫省馬步兵勇會合擊剿頃據張學醇等抵潁來稟張落刑分兩股在該郡之南照集及陳家橋屯紮等語臣見飭該文武將弁奮力擊剿不准稍涉遷延皖豫捻匪經大兵疊次痛剿前後斬殺不下三四萬人解散匪黨不可勝計見雖暫時懾伏而反側未安若遽議撤兵難保不復行嘯聚然當經費支絀之際重兵久駐費用甚鉅殊難爲繼連日與袁甲三熟商擬陸續先將東勇及滑縣南汝光之勇次第裁撤所有馬步官兵及宋毫各勇仍由袁甲三統帶隨時相機辦理惟匪蹤距豫雖遠北路尙須兼顧豫省兵勇已入皖境三百餘里裹糧遠行道路生疏擊剿恐難得手臣擬責成鄭魁士會同珠克登郝光甲等躡賊所向進駐要隘盡力偵剿其商邱永夏等處已

飭開歸陳許道徐繼鑄等各帶兵勇分頭按捕安撫居民以清伏莽徐宿一路俟穎郡情形稍鬆再令傅振邦折回仍紮營臨潁隨時巡緝以靖地方劉家口一帶自徐宗幹到後督辦團練地方極爲靜謐臣見出豫境宋郡未免空虛已飭徐宗幹移紮歸德以資彈壓上諭捻首張落刑自雒河巢穴攻破後僅餘敗匪三百餘人迨至蒙城裹脅已有千餘是其黨與蔓延仍不免沿途勾結見在該匪圍撲穎上業已盡趨南路正應合力追擊使之無從喘息方能淨絕根株昨據和春福濟奏自褚家湖至蒙城數十里中捻匪竟有三十八股數逾萬人今張落刑屯聚穎郡一帶勢必併爲死黨見在郝光甲已帶兵前進英桂添派之佐領松志等並懷遠派來之遊擊俞應彪正陽關派來之守備陳廣譽計已先後會合傅振邦亦由臨潁集前進正可四面兜剿著英桂督飭諸軍剋期

會勦先將潁匪大股殲除其餘分投迎擊則脅從之眾諒卽解散
總期互相援應不可任令各軍稍分畛域英桂已駐亳州呼應較
靈卽著妥爲調度毋失機會至歸德一帶自應有大員彈壓以顧
亳州之北惟徐宗幹昨已有旨令其馳往安徽軍營著英桂詳加
酌度如歸德一時無人鎮撫卽令徐宗幹暫緩前進儻有結實可
委之員仍當令其速往廬州藉資襄辦金陵逆賊窺伺江北揚州
軍營需兵甚急所有黑龍江餘丁卽著飭令迅速啟程毋再遲延
將此由六百里諭令知之○伊犁領隊大臣勝保奏繳硃批並陳
前辦軍務情形得旨汝見雖非統帥何妨歷陳所見所知並舉汝
素所信者汝受朕厚恩不料汝乃不實若是此疏雖思自效而云
羣情不諒是汝之獲咎似誰爲傾軋卽使真有其人朕豈肯明受
彼欺朕治汝之罪亦非朕先存成見皆汝之自取也汝今棄瑕復

用不思自愧仍作是不平之詞事君之義顧當如是乎豈尙未自
悟耶抑故態復萌耶汝尙非無血性者惟自是非人回護已過若
云少年心性年近四旬亦不爲少若畢生莫悛非廢物而何朕曾
用汝信汝故是時雖在邊荒尙不惜詳細批諭不知汝悔恨否又
奏甘肅官兵滋事漢回勾結野番於關內外搶劫批此奏甚是不
似正摺空言塞責○己亥諭內閣德勒克多爾濟等奏哲布尊丹
巴呼圖克圖領受金冊謝恩呈進佛位哈達並派喇嘛懇請轉奏
呈進九白一摺哲布尊丹巴呼圖克圖領受金冊謝恩擬派喇嘛
進九白貢所請尙屬出於至誠著准其呈進九白並賞給哲布尊
丹巴呼圖克圖黃哈達○庚子諭內閣桂良奏刁民聚眾滋事請
將防禦不力各員分別懲處一摺直隸鉅鹿縣匪徒楊進榜等聚
眾抗糧一案經該督委員將該犯等拏獲起解楊進榜之子楊黃

毛膽敢誘脅多人闖入縣署劫放監犯燒毀監屋該地方文武毫無抵禦實非尋常疏忽可比鉅鹿縣知縣汪福庚著摘去頂帶交部議處同代理鉅鹿汛把總外委郭俊德一併撤任畱於地方勒限嚴緝務獲究辦順德府知府趙楨生著交部議處○諭軍機大臣等何桂清奏請飭和春幫同向榮分路籌剿並建平已有賊蹤急籌堵剿等語見在向榮退保丹陽往來布置尙有福興張國樑諸人和春督兵廬州該處被陷州縣未復者尙屬不少勢難遽離皖省惟向榮兵力實單甚爲可慮見在捻匪漸平已諭榮桂酌撥精兵前往丹陽助剿矣據奏甯國連獲大勝見已進偪城垣如能將甯郡趕緊克復則句容溧水不難次第奏功見在賊犯建平浙省固屬喫緊而東壩爲蘇常門戶未可遽撤防兵著與向榮會商布置未可顧此失彼墮逆賊聲東擊西之計廣德建平距丹陽較

遠卽著何桂清統籌防剿毋令賊蹤內竄將此由六百里諭令知之○諭何桂清奏紫金山大營失利請籌添兵將並奏賊從博望竄至定埠窺伺建平等情向榮退守丹陽原爲嚴防內犯起見隨後句容復陷逆匪見又窺伺建平秦如虎東壩一軍已馳赴該處以固浙省門戶惟定埠之賊竄至下壩已在東壩後面秦如虎旣與浙江委員仲孫懋拔營往援建平而東壩爲蘇常門戶見在何人往守向榮近在丹陽必當兼顧不可稍有疏虞據何桂清奏甯國連獲大勝見已進逼城垣若能克復甯郡稍振聲威則句容溧水當不難次第克復丹陽大營布置旣定向榮仍應督飭張國樑等相機進剿戰守兼籌斷不可因大軍新挫專以株守爲事江面紅軍等船能否沿江攻剿之處諒必與怡良等商辦至向榮軍營兵力單薄前調陝西綠營官兵一千名已馳赴揚州該大臣卽咨

商德興阿派令迅速渡江協剿其前調閩廣各兵一時未能卽到已諭令英桂將該營西安馬隊一千名酌量抽撥並另選得力官兵一二千名由揚州取道前赴丹陽交向榮調遣該大臣卽飛咨德興阿等一俟河南撥兵過境務卽飭令渡江以資攻剿將此由六百里諭令知之○諭前因向榮兵單諭英桂將陝西綠營兵一千名調往助剿嗣因金陵營盤失陷全軍退扼丹陽復諭英桂將此項官兵改赴揚州交德興阿查看江南情形再行由揚撥調其撥往揚州之黑龍江餘丁五百名亦諭該撫催令啟程至西安馬隊官兵一千名前經調往宿州軍營見據英桂奏已派令隨同袁甲三等節節攻剿捻匪惟捻巢已破其勢漸衰而向榮軍營存兵甚少自當先其所急著英桂酌量情形或將西安馬隊一千名全行調赴揚州再由揚取道前往丹陽或因馬隊得力未能卽行全

數撥出亦著分撥若干另抽得力步兵一二千名飭令迅由揚州
取道前赴丹陽俾向榮兵力稍厚得保江浙完善之區此乃今日
急務該撫當竭力籌畫斟酌應付以顧大局至擒匪零股雖多但
能先將擒首張落刑殲除其餘次第搜捕加以解散脅從諒不難
於淨盡仍著該撫嚴飭帶兵將弁實力追捕如能悉數捕滅則兵
力有餘正可調撥大江南北以助聲威將此由六百里諭令知之
○辛丑諭軍機大臣等怡良等奏內河布置情形及荆宜民團捕
匪得力等語逆匪由白兔五里鋪分股撲營我軍大獲全勝焚毀
新紮逆巢賊雖未敢再犯丹陽而通達蘇常之路甚多溧陽東壩
等處雖經向榮派江長貴明安泰就近堵截未知有無把握向榮
軍威稍振自應乘勝追剿步步前進俾逆賊有所忌憚方可捍衛
蘇常但應防隘口甚多兵力益形單薄怡良近駐常州調度較易

著會同趙德轍加意籌防此時惟有實行團練以民助兵以剿爲防內圍旣固而後可戰可守該逆自不敢內犯此次宜與荆溪練丁殲除外來船匪足見辦團禦侮著有明效此外各縣均須普律辦理以濟兵力之不及怡良等務當認真督勸勿稍鬆懈腹地應行堵守之處該督等不得專恃向榮致有疏失將此由五百里諭令知之○諭昨因向榮軍營需兵甚急諭令英桂將西安馬隊官兵酌量分撥並令抽步兵一二千名均由揚州取道前赴丹陽所調官兵必須鎮將大員統帶方能得手因思徐州鎮總兵傅振邦曾在向榮軍營尙屬出力見在安徽擒匪漸就肅清著英桂傳知傅振邦令其速往向榮軍營隨同剿賊英桂所派前赴丹陽官兵著卽交傅振邦統帶前往務須揀選精兵俾資得力至擒匪老巢旣破雖蒙城一帶裹脅尙多大率皆烏合之眾如將首匪殲除餘

黨自不難於解散著英桂會同袁甲三督飭各路將弁迅將餘匪趕緊殄滅其徐州鎮總兵著派史榮椿署理所有該處防剿事宜卽責成該鎮認真督辦勿稍疏失將此由六百里諭令知之○諭舒輿阿奏回匪勾結日眾見飭分股勦辦一摺又另片奏漢回讎鬪勢難姑息擬次第查辦等語滇省漢回互關相習成風全在地方官辦理得宜自能消患未萌不至釀成巨案茲據奏稱該處回匪自燒搶漢民村莊及至省城滋事後仍敢四處糾人遠近響應迤東之尋甸迤西之姚州皆有匪徒聚伏而近省之宜良嵩明等州縣亦有圍撲城池阻截文報之事見經該撫等派撥官兵練勇分投救護嵩明州城圍已解宜良賊眾亦殲斃多名餘匪逃竄並將攻撲鎮南州城回匪先後擊退匪勢鴟張非痛加勦洗不足以儆兇頑惟其中良莠不齊自應分別勦撫兼施著卽責成舒輿阿

文祥先將警不畏法之徒痛加剿辦聲威所至餘眾自必畏罪投誠儻官軍一到卽能悔悟捆獻首逆者卽予免罪仍剴切曉諭解散黨與總當除莠安良先剿後撫分別辦理既可折服漢回之心亦不至久勞兵力恒春見在貴州所有滇省回匪應如何布置辦理之處仍著隨時知照舒興阿等妥籌商辦將此由六百里各諭令知之○癸卯胡林翼奏武昌援賊在豹子澥等處築壘掘濠臣抽調三千人及其未定迎擊之五月十二日遇賊於茶棚李續燾以東路之賊行陣不整因匹馬衝鋒眾勇隨之殪其前鋒數十名賊眾駭愕乘勢掩殺東路之賊遂敗同知唐訓方等力攻中路中路之賊敗歸西路唐協和等力禦西路之賊酣戰最久唐訓方等從旁鈔之西路之賊亦遂大敗追奔二十里至二虎井收隊回營計共殺賊五百八十餘名生擒二十餘人奪獲旗幟槍礮多件十

三日偵賊將遁追至八角嶺賊復遁豹子澗又追敗之遙見賊數千人從梁子湖濱縱火焚燒民房以數千賊伏於麥門橋房屋及林木深處湖邊列賊划數十隻蔣益漚由驛路渡麥門橋先以火箭噴筒延燒林木及村外積薪伏賊冒火衝出我軍以劈山礮轟斃悍賊數名賊遂敗潰而湖濱之賊悉眾來援唐訓方擊之斃賊十餘名水賊又飛槳來救李續賓火器突起焚賊舟六隻水陸之賊均潰我軍尾追三十餘里至新店賊復反旗相向各營奮擊立斃先鋒賊目數十名賊又敗走我軍沿途勦殺行抵葛店賊奪路奔竄自相踐踏死傷甚多計共斃賊數百名臣於附省要隘均掘長壕防其竄逸二十二至二十九等日城賊疊次出撲均經我軍擊敗殲斃甚多二十九日獲賊間諜知逆賊古澹賢敗匿武昌縣之樊口依戰艦爲壘賊目僞指揮鄭添得等復領賊七八千人進

踞葛店地方臣選派精銳三千餘人以同知蔣益澧統之令署武昌縣知縣林之華率武勇爲鄉導初二日將及葛店蔣益澧合參將朱品隆等繞出葛店街市後而自領一軍循江岸橫衝賊壘賊見我軍無多分路迎拒哨官劉勝祥等首先攻撲賊壘賊以大礮連環拒敵官兵伏地避之三伏三起搶入賊壘賊卽奔竄唐協和率勇邀擊共殺四百餘名蔣益澧獨以湘左營首先撲入左路賊壘殺賊四百餘名其時朱品隆等已繞至賊後焚燒街外賊巢楊載福親率水師登岸以截奔竄之路賊眾四路狂奔各營夾擊共殲二千數百人其分哨以燒內湖賊舟者亦奪得賊船九隻各營乘夜窮追及於華容初四日及於樊口樊口東岸卽武昌縣城外西山雷山蟠互險峻賊扼要守險築壘設關賊船憑依陸壘得以出沒江湖又於城外築壘互相犄角夾護賊舟初四日陸勇追賊

至此紮營西岸得勝洲楊載福率水師登岸與蔣益澧等會商夾擊是日陸路各營分五路齊進直偪賊壘轟擊賊匪落水死者數十人蔣益澧遂傳令鳧水先渡奪獲賊船者重賞千總邵有才首先鳧水奪得三板船一隻守備陳仁蘭躍登賊舟中礮擊水陣亡哨官王桐柏復登楊德武繼之於是各營馮河鼓勇陸師攻其後水師攻其前內港之賊棄船先潰焚船踏壘殺斃溺斃者約二千餘人西山雷山賊旗四布與踞城之賊互爲聲援尙未敢馳下交戰而先渡樊口各陸勇已與水師登岸攻縣城北門小北門各營官帶領壯勇翻越山嶺賊眾驚潰乘勢掩殺遂分攻縣城西門小西門署知縣林之華亦率武勇繞攻東門先後入城追奔逐北城郭一空其得出小南門逃竄者不過餘賊數百人我軍追至南岡七里界而還所有出力員弁勇丁可否准予擇尤先行獎勵伏候

聖裁其前後力戰陣亡員弁並請飭部分別議卹以慰忠魂

上諭內閣此次水陸各軍往來分合奮力環攻甚爲得手著胡林翼迅飭諸軍乘此聲威進圖克復省城出力員弁兵勇准其擇尤先請鼓勵力戰陣亡之守備陳仁蘭著從優照都司例議卹千總曹起龍著照守備例議卹把總胡立發陳日勝黃雲浦均著照千總總例議卹外委魏學法張光連尹見興丁仙源崔得勝歐洪培楊玉春李大成均著照把總例議卹○甲辰諭內閣前因戶部議覆糧臺章程並奏陳軍營冒濫積弊當經諭令各路統兵大臣及糧臺各大員將支發總數每月開單奏報並勒限一箇月將放款章程先行覈定聲明例案詳晰奏報以備查覈乃自咸豐三年十二月間通諭之後已逾兩載各路糧臺總以趕辦不及爲詞惟向榮軍營曾有遵照填報之奏亦未見續有奏報當此軍務未竣度支

孔憲若再任令日久稽延恐奏銷時弊竇叢生愈無稽考其應如何酌定期限隨時清釐以杜浮冒之處著戶部再行妥議章程具奏○諭軍機大臣等前因有人奏雷以誠軍營委員雷鳳翔黃鍾吳雲翁壽慶虞詠齡勸捐發餉種種營私索詐當經諭令德興阿等查提歸案嚴訊本日復有人奏吳雲以泰州人徐震甲爲牙爪無利不搜見在蘇州城內開設布莊黃斌黃鍾在揚州方家巷置買潘莊田產各等語軍營委員似此藐法營私科歛肥己實屬大干法紀著德興阿等就近查訪揚州有無黃斌等所置田莊其吳雲在蘇州開設布莊並著移咨趙德轍一併查辦再據向榮奏管帶馬隊協領德昌前因打仗面受石傷諭令隨營醫治並不遵令竟帶馬隊潛行渡江等語業經明降諭旨將德昌革職畱營效力仍著德興阿等查明該協領因何帶領馬隊潛行渡江有無別故

一面具奏一面勒令該協領仍帶馬隊回至向榮軍營戴罪自效毋稍稽延將此由五百里諭令知之○向榮奏查逆匪自白兔鎮敗退後六月初一日復糾賊眾約七八千人分股來撲總兵虎嵩林等督隊迎剿擊斃多名初二日早賊至丹陽五里鋪一帶屯踞分五路繚擁而來勢甚猖獗千總程翔蛟整隊迎擊適臣派守備李日昇帶隊由中路馳至大呼直前賊之馬隊卽時驚走忽後隊突出賊目數人揮眾抗拒把總馮觀勝督同勇目李善華驟馬直衝均被槍傷甚重我軍齊出該逆拌死不退維時李鴻勳虎坤元等亦分左右兩翼衝殺槍礮齊施逆眾紛紛倒地張國樑見中路賊勢較眾卽調後隊分兩路鈔出兜擊自領一軍直衝賊隊連砍悍賊多名逆勢不支卽時奔潰左右兩路之賊見中路敗走亦卽紛紛潰散臣福興指揮馬步分投掩殺斃賊無算其有撲溝跳塘

者均被我軍戮斃追殺十餘里直至全州鋪賊壘始各收隊統計是日之戰斃賊四百餘名斬取長髮首級五十餘顆查該逆經此一挫兇燄稍息惟續來賊黨甚多在丹陽西南鄉全州鋪丁莊鋪松柏村一帶連立多壘並探鎮逆於初四夜分黨二三千人由七里店植樹岡群村已到丹陽之白兔鎮地方聯絡築壘且白兔離寶堰較近該處有小河一道內通常州臣復派令總兵虎嵩林統帶兵勇馳赴距寶堰三十里之珥林鎮地方紮營防賊內犯常州之路又探得溧水之賊糾合小丹陽當塗逆匪數千由毛公鋪大村分竄東壩之定埠有三路撲犯東壩之謠該處爲蘇浙門戶僅有副將秦如虎一軍爲數不及二千情形喫緊已由明安泰就近撥兵會剿臣復派令江長貴由金壇統帶兵勇一千四百名兼程趕往會同秦如虎攔頭截擊一面飛咨鄧紹良就近策應至前蒙

飭調福建漳泉兵勇三千名復經臣等奏調廣東官兵四千名前來會剿茲接何桂清函稱閩省官兵因行裝銀兩未就一時未能啟程聞之實深焦灼見在江南賊勢猖獗攻剿萬分喫緊懇恩飭催閩粵官兵迅速啟程前來以期重振軍威痛加掃蕩上諭向榮奏賊眾撲犯丹陽營盤迎剿獲勝一摺此次逆賊糾眾來撲雖經擊退而全州鋪及白兔鎮等處均有賊壘分布卽就丹陽一路而論已屬防不勝防況此外內通蘇常之路不止一處卽如溧水一股由毛公鋪竄至定埠已在東壩東南昨據何桂清奏報建平北門外二十里已有賊蹤之語向榮此次摺內尙稱派江長貴會同秦如虎闌截東壩之賊不知秦如虎同浙江委員仲孫懋已離東壩前往建平可見專駐丹陽於各路聲息轉形稽滯必須進扼金陵重整舊時壁壘方能統馭兼籌此時暫駐東路原爲休養銳

氣仍圖進取若僅能專顧一隅而於各路布置未能周密恐中該逆聲東擊西之計總以四路控馭絕其內犯爲最要關鍵俟軍威稍振仍當進逼金陵不可被賊牽掣致成鞭長莫及之勢所請閩廣各兵已疊降諭旨飭催而調到需時尙久本日復諭和春福濟再行撥兵一千六百名連前撥馬步四百餘名湊足二千之數前赴丹陽較之閩廣更爲近便其火輪船入江一節前令向榮等酌調助剿卽著咨商怡良趙德轍何桂清催趲入口並將應備口糧子藥寬爲籌備與紅單等船一併接濟其前此諭令添購輪船亦著會商各該督撫迅速籌辦至總辦糧臺彭玉雯聞其年力已邁此次餉銀被搶雖係倉卒失事究難保無疏於照料之處著向榮查明該員是否精力不繼其平日支應一切有無浮濫如果不能得力卽將該員撤回另行委員接辦儻尙無貽誤亦著據實覆奏

將此由六百里加緊諭令知之○諭前因金陵需兵並溧水失守
疊經諭令和春等派撥重兵渡江應援旋據奏稱兵勇無可分撥
僅派協領輯順等帶馬步兵四百餘名前往協剿等語向榮大營
失利已於五月十九日退守丹陽而句容縣城復陷溧水等處賊
匪蔓及定埠窺伺建平內犯之路甚多賊眾兵單難資堵禦蘇杭
各屬爲東南財賦之區大局攸關該提督等近在鄰封豈可擁兵
膜視前此皖省情形緊急均由向榮軍營抽調兵將前來救援今
向榮因兵單不振而廬州擁兵雖眾日久無功和春等於請餉則
極言兵勇之多至撥兵則又言兵勇之少卽如徽甯等屬均福濟
所轄地方業已委諸江浙卽池州等屬民皆從賊近日江面水師
攻克銅陵拏獲賊船糧石皆係偏脅民間供億此外州縣村莊類
此者諒尙不少亦不聞該撫設計接剿直似廬州巡撫自衛營盤

於境內多賊久踞竟置若罔聞實堪痛恨該處兵勇除撥赴懷遠
宿州等處外尙屬不少著和春福濟刻卽挑選精銳馬步官兵一
千六百名連前次派出之四百名共湊足二千名派委得力員弁
統帶卽日前赴丹陽交向榮大營調遣不得心存畛域仍以無兵
可調爲辭遲延貽誤將此由六百里加緊諭令知之○向榮奏據
副將李德麟稟五月初九日賊在銅陵大通以上徧收米糧封擄
民船百餘隻卽欲裝送金陵並有小礮船十餘隻護解當派把總
劉裕安等帶領兵勇百餘名坐駕長龍爬艇數隻並派鹽知事胡
恩植等管帶豫勇快解三船新募水勇划船十隻連夜盪槳而上
次農行至土橋江面遙見賊船蔽江而下我師退伏於鯉魚套蘆
葦叢密處見賊前船將近一齊擁出開礮轟剿該逆亦放槍礮環
拒我師分船包鈔賊船驚遁其時後幫賊船見前船有失均卽回

竄又經水勇划船飛棹攔截其前快解各船追剿於後礮火交施該逆紛紛投水餘船亡命奔竄正在跟追忽見銅陵城內之賊前來接應我師轉棹轟擊該逆抵拒移時勢漸不支兵勇乘勝登陸鈔襲賊匪大潰不敢回城斯時城內餘賊亦開東門逃竄我師不便窮追旋即收隊入城安撫百姓並將賊館一切全行焚毀惜兵勇無多未能守城止得回船東下查水師各船孤泊上游該士卒猶能疊挫兇鋒斷賊接濟實屬奮勇可嘉謹將尤爲出力員弁兵勇存記彙獎一面飛咨鄧紹良將浙省籌備軍餉子藥就近設法護解赴船接濟並因江面攻剿喫緊所有上海甯波紳商所購火輪二船見值海運事竣可以借撥入江助剿兼運送上游紅單子藥於攻剿更有裨益臣見已咨商蘇浙督撫臣覈飭遵辦得旨此次水師各船停泊上游尙能疊挫兇鋒斷賊接濟頗資得力所有

在事出力員弁兵勇著向榮擇尤保奏候朕施恩○向榮奏謝革職留督軍務恩得旨汝雖退守丹陽務期步步前進直擣金陵勿爲賊勢所乘見在固應稍養銳氣若進時尤不可遲疑○子江甯陣亡遊擊扎拉芬等祭葬世職○以紳勇防剿出力永廣湖南湘鄉縣文武學額各三名○丙午諭軍機大臣等據翁心存奏籌防宜興東壩並豫堵太湖水路一摺所稱賊越東壩而南恐由間道內竄則丹陽常州之兵隔在西北不及救援等語於籌防形勢不爲無見惟鄧紹良見在總統甯國諸軍張國樑又須往來策應均不能令其專駐下游一隅之地宜興一路旣距無錫較近自不可不嚴爲之防昨據怡良奏派兵三百名赴該處駐紮是否足資堵禦東壩一路自秦如虎折回建平後江長貴是否已由金壇前往明安泰見在溧陽所統兵勇約有五六千人能否責令兼顧東壩

著向榮等妥籌辦理荆溪宜興民國焚船殺賊頗能出力亦著怡
良等加意激勵令其自衛萬不可稍形懈弛致有意外之虞向榮
前奏驅逐寶堰一帶船隻係防賊內犯常州其由太湖入蘇之路
該尙書所指長蕩滬湖東西沈等處亦應一體收集船隻毋爲賊
用太湖波濤浩渺港汊紛歧非尋常船隻所能遠涉果能盡收各
口湖船賊匪自無從偷渡太湖協水師副將周希濂見在上游督
帶艇船其本缺係何員署理自應責令嚴密稽查以資防範另片
奏近日蘇常諸郡有按畝捐輸制錢百文之說請飭停止等語如
果並未舉行事屬可已自宜停辦儻因軍餉不充不得已而出此
亦宜查照從前辦過成案酌減捐數以順輿情勿致滋生事端原
摺片著鈔給閱看將此由六百里加緊各諭知之○和春福濟奏
據霍邱太和各州縣稟報捻匪分股四竄均經地方擊退惟宿州

生擒二十餘名內丁有孜賈開汰賈恆汰唐圭係張落刑死黨著名兇悍均已就地正法蔡昌言等在潁上守城該逆疊次攻撲我軍開放槍礮擊斃多名賊因屢挫遂退回潤河集該參將復督帶兵練於六月初一日往剿斃賊一百餘人郝光甲已抵潁上多慧因正陽一帶有由毫分來捻股飭調蔡昌言回關鄭魁士已派塔思哈馳往六安迎擊復咨珠克登挑陝甘兵五百名赴潁策應黃元吉帶壽州練勇赴正陽隨同多慧堵禦袁太華帶勇在潁州府境四十里鋪等處截殺等語查皖軍僅五千人兵分則單恐一時未能兜剿而由毫竄來捻股愈聚愈多且馬隊不少各路兵勇正宜乘勝尾追不分畛域見止侍衛伊興額署總兵傅振邦帶領馬隊五百人行至沙河口豫省兵勇行抵何處未據各州縣稟報頃接亳州探稱雉河僅餘空穴零匪四散似該境並無大股萬一援

剿稍遲致死灰復然捻勢愈難收拾應請旨飭令江豫官兵迅速前進以期早除民患 上諭和春等奏見辦防剿情形並請催江豫官兵進剿捻匪各摺片廬營兵勇分駐軍鋪等處並未實力進攻和春等所稱廬江桐城無爲巢縣安慶擬以次攻擄等語雖似極力籌畫仍屬毫無把握此時巢縣賊船足爲長江之患吉順駐兵該處已閱年餘並未實力接剿既據和春等奏稱見籌設法焚毀著卽飭吉順迅速設法辦理毋再延玩致貽後患雉河捻巢經袁甲三等攻拔因東南無兵堵截致首匪張落刑等由蒙城竄至潁州英桂已派令佐領松志參將成齡等統帶馬步兵勇分往潁州潁上援剿是豫省官兵實已深入皖境數百里徒以皖兵未與會遇致和春等未能知悉該兵勇等裹糧遠行道路生疏著和春福濟飭令珠克登郝光甲並鄭魁士所募壯勇奮力前進與豫省

官兵前後夾擊將此股餘匪速卽殲除毋得遷延株守致誤事機其正陽關潤河集等處股匪並著督飭多慧袁太華黃元吉等分投堵剿使擒匪迅就肅清專力攻剿廬州屬邑次第克復各城庶不至勞師糜餉無尺寸之功大負委任也將此由六百里諭令知之○丁未某名琛奏英美佛各國以定約十二年請重訂條約見設法開導阻止○予故升任貴州布政使署廣東按察使沈棣輝祭葬卹廕如軍營病故例○予廣東陣亡遊擊嚴世坦廣西陣亡副將福格等祭葬世職○戊申諭軍機大臣等前因曾國藩奏請在上海抽取釐金接濟江西軍餉等情當諭令怡良等體察情形具奏茲據奏稱江蘇軍需局用款浩繁專賴抽釐濟餉未能分撥江西且上海地方華夷雜處該地方官紳年餘以來辦理尙屬相安若再另行派員前往辦理實多窒礙所奏自係實情抽釐濟餉

本屬不得已之舉況江蘇本省需餉已多所有上海釐金止可留作蘇省經費曾國藩所請飭調顧椿專辦抽釐以濟江西軍餉之處著毋庸議將此由四百里各諭令知之○庚戌諭內閣前因各直省大錢鈔票未能暢行疊經諭令各該督撫剴切示諭民間按成搭解錢糧以期通行無滯惟錢鈔之行必自近及遠本日據給事中仙保奏直隸保定府清苑縣至今並未出示曉諭以致商民無所取信鈔票大錢仍多窒礙直隸一省尙形阻滯他省自更難流通著桂良查明該省地方官如果未經出示曉諭其爲收銀買鈔或買大錢搭交藩庫營私肥己情弊顯然卽著據實參奏○辛亥直隸永定河溢○壬子諭軍機大臣等廉兆綸奏廣饒情形危迫請迅速撥兵救援一摺據稱饒州自畢金科一軍接仗失利賊勢猖獗防守喫重廣信水陸可通饒州而練勇僅二千餘人不敷

分撥勢極孤危等語覽所奏情形自係萬分緊急業經諭令王懿德呂佺孫何桂清於附近廣饒等處酌撥官兵助剿矣惟賊踞徽甯浙之湖州一帶防堵正形喫緊閩省前調兵勇三千令改赴江南尚未過浙恐軍裝器械急切不能完備今調赴廣饒之兵亦恐未能卽到見在廣饒二郡尙爲該省完善之區斷不可再有失事著曾國藩文俊通籌大局設法分兵兼顧饒州卽以保全廣信毋令與省城聲息不通致成孤危之勢其援兵未到以前著廉兆綸督同地方官實力團練以固藩籬將此由六百里加緊各諭令知之○諭本日據廉兆綸奏饒州緊急廣信孤危請速飭派兵救援一摺江西情形見止廣信一府尙稱完善可與省城通氣饒州旣形緊迫該處勢處孤危不得不急籌援應前調福建兵三千名已令改赴江南著王懿德等於鄰近廣饒各營汛內籌撥兵二千名

派員管帶迅速取道前往饒州廣信一帶擇要援應至浙江見在辦理甯國防剿兵力自屬難分惟廣信爲浙省藩籬亦應兼籌策應何桂清前派往衢州防剿兵勇除調回外尙存若干若能派往廣信卽可以剿爲防如兵數已屬無多卽於金衢嚴各屬內酌量抽撥官兵一千名前赴廣饒一帶藉資堵剿將此由六百里加緊各諭令知之○癸丑諭內閣和春福濟奏剿辦捻匪獲勝一摺捻匪自雉河集擊敗後分股竄擾蒙城疊經鄉團堵剿該匪等欲由沙河竄赴潁上署蒙城縣知縣俞澍派令勇目顧其仁會同三義集等處團練萬餘人馳往截擊斃匪一千餘名奪獲馬匹器械無算太和縣地方另股匪徒亦經該縣侯樞臣督團堵剿於五月十四等日在高公廟等處斃匪數百名生擒擒首五名餘匪敗竄該二縣團練於擒匪竄至均能隨同官軍剿辦實屬奮勉出力仍著

和春等飭令各路官兵將敗殘零匪悉數殲除毋畱餘孽○甲寅諭軍機大臣等昨因廉兆綸奏廣饒情形危迫已有旨令曾國藩等設法兼顧饒州保全廣信毋令與省城聲息不通本日復據奏稱饒郡於六月初五日失守廣信萬分危急攻剿建昌愈難鬆勁請將撥赴向榮軍營之閩省兵勇三千全數截畱以資分撥等語饒郡與省城撫州廣信壤地毗連見既爲賊竄踞當防其四出滋擾儻由安仁餘干橫撲則省城道路梗塞文報餉運無路可通卽撫建兩路進攻亦恐未能得手著准其將張從龍所帶兵一千六百名專攻建昌陳上國所帶兵一千五百名馳往廣信會合本郡練勇分防要隘仍卽相機規復饒州以遏賊勢該侍郎等亦當統籌全局設法兼顧一面趕緊攻克撫建一面酌撥兵勇與閩兵會合務將饒郡及早克復庶不受逆賊牽掣之患見在金陵剿匪正

常喫緊其由閩省續派琳潤等所帶兵勇一千四百名如過江西境內卽飭迅赴金陵大營至昨諭福建添調兵二千名原爲援應廣饒之用今廣信旣截畱兵一千五百名所有續調福建兵二千名已諭知王懿德等飭令馳赴向榮軍營江西毋得再行截畱致滋貽誤將此由六百里加緊各諭令知之○諭昨據廉兆綸奏江西廣饒兩郡情形危急前調閩兵三千已改赴江南當卽諭令王懿德等於廣饒鄰近各營汛揀選精兵二千迅速派往以資堵禦本日復據廉兆綸奏饒郡業已失守勢更危迫所有福建派往江南之張從龍陳上國所帶官兵已准其分撥廣建兩郡助剿矣廣信見旣畱兵一千五百名則昨諭續調之閩兵二千名自可毋庸再赴江西向榮扼守丹陽東壩等處賊眾兵單亟須添助著王懿德等卽飭將琳潤禧祿所帶官兵一千四百名飛催速往江南並

將續調之官兵二千名迅速揀選精銳派委得力將弁一併馳赴
向榮軍營以資調遣毋任延緩將此由六百里加緊諭令知之○
諭本日據何桂清奏遵調護運火輪船入江並委員赴上海籌辦
添購輪船一摺據稱所有甯商護運之火輪船業經派員管帶由
圖山關飛駛入江聽候向榮調遣其需添購之輪船亦已委令金
安清何紹祺張庭學楊坊陳元鼎等前往上海妥爲購募並籌款
辦理此項船隻入江助剿於江南軍務大局甚有關繫所有滬商
護運之火輪船著怡良等迅速派員督帶入江統歸向榮調度至
添購一節自不可少而需費較鉅必當設法辦理著怡良趙德轍
遴委幹員飭令前赴上海會同金安清等迅速籌商務令經費有
著得以剋日奏功將此由五百里諭令知之○諭本日復據廉兆
綸奏報饒州於六月初五日失守並據何桂清奏稱饒州情形緊

急等語廣信毗連浙省值此賊勢鴟張情形危迫所有派出官兵
著何桂清飭令迅速前進交廉兆綸調遣遠防不如近剿但能廣
信無虞卽浙東亦可安堵該撫定能通籌大局悉力辦理此外應
如何嚴密防堵並著嚴飭在防文武實心籌辦至涇縣祁門等處
時有賊匪窺伺著何桂清傳諭張芾相機堵剿毋得再有疏虞致
干咎戾將此由六百里加緊諭令知之○英桂奏捻首張落刑自
雉河攻破後潛竄蒙城糾結裹脅千餘人經袁甲三飭派馬步緊
追該匪直往東南奔竄由潁州之江口新集一帶渡過沙河直撲
潁上廟臺集垂岡集地方查該處捻股甚多且又通正陽關大道
跨據淮河其南岸卽霍邱迤西毗連固始等處道路紛歧辦恐
致費手當飭副將樂善編修袁保恆分帶兵勇星速前進會合參
將成齡等併力進攻一面飛咨傳振邦郝光甲等會合兜剿復商

令袁甲三酌帶兵勇由雉河赴潁州一帶督率剿辦頃據探報該匪等因官兵齊抵潁上不敢存紮欲由水路竄往正陽關經侍衛多慧堵剿殺斃騎馬賊匪多名匪眾旋由潁上向西紛竄袁甲三馳抵潁郡因賊蹤已西我兵必須繞前迎擊當令樂善袁保恆傳振邦伊興額等由潁上六十里鋪一路向西緊追行至曹家集地方適該匪在南照一帶屯聚糾眾數千蠶擁而來樂善率領馬隊向前迎敵該逆分路逃散我兵分追至黃岡寺南照集共殺賊四百名其時三河尖告急袁保恆拔營往援詎意三河尖已於六月十五日爲賊攻破該匪擄掠槍礮裹脅人眾盡屯河北以禦我軍袁甲三飭伊興額等帶兵前進與賊接仗互有損傷官軍卽在曹家集屯紮頃據王庭蘭函稱逆匪由南照潤河一帶撲入霍邱縣境之高唐集汪家集等處勾結土匪李三謨等千餘人竄至三

河尖地方經王庭蘭派撥兵勇前往援剿駐紮河西其河東一面係霍邱壯勇把守連日與該匪隔河轟擊疊獲勝仗十六日該匪愈聚愈多浮水來撲河東勇力不支匪眾登岸肆行焚搶王庭蘭聞信馳救該匪紛紛過河與我兵巷戰互有殺傷王庭蘭以三河尖距固始縣城九十餘里恐該匪深入固境當卽收隊在固始適中之戴家店地方駐紮堵禦等情臣查三河尖地方本係水陸衝要下游直通正陽關上游可達光固汝息近與固始接壤更爲喫重卽飛札署光州知州蒯賀蓀等帶勇馳往固始防剿並飛調邱聯恩帶兵馳往三河尖固始一帶會同王庭蘭合力剿擊如果情形緊急臣卽擬由陳州前往光固應援一面飛咨多慧布置守禦檄飭塔思哈統帶兵勇會防合剿沿淮北岸已飭候補知縣廖慶謀帶領兵勇六百名並號召團練隨同駐紮中心岡老鸛巷等處

與王庭蘭蒯賀蓀等夾岸爲營互相聯絡袁甲三駐紮潁州本係適中之地惟南路旣處處扼守北路亦在在堪虞復飭珠克登嚴守蒙城隨時勦辦自雉河以至泗河兩岸餘匪未淨正宜勦撫兼施卽令西凌阿崇安等仍駐雉河密爲防範臣見駐亳州宋郡未免空虛暫畱徐宗幹駐守歸德藉資鎮撫上諭英桂奏擒匪竄撲三河尖距固始縣城九十餘里其勢尙復鴟張該撫飭邱聯恩帶兵前往會同地方官紳合力攻擊尙恐不能力挫兇鋒儘令深入豫境又將蔓延北路英桂袁甲三分駐亳州潁州重兵全在皖境必須盡力追擊由北而南使匪蹤不敢回竄方不失會勦本意不可專駐亳州致成鞭長莫及之勢英桂見擬由陳州前往光屬卽著迅速前進迎頭兜截此時蒙城潁上一帶匪勢尙未肅清而以三河尖一股爲最巨似兇悍擒首多在其中果能將此股殲除

其餘自當瓦解較之零星剿辦更爲扼要著英桂酌度機宜迅籌妥辦多慧塔思哈扼守正陽珠克登扼守蒙城西凌阿崇安扼守雒河集徐宗幹暫駐歸德所有北路布置尙爲周妥無論皖兵豫兵皆在該撫調度之中據稱客兵僅止直隸一千七百山東一千五百是專指由豫帶往兵數而言其江皖兩省撥來之兵不在此數如果不分畛域通盤總計剿匪之兵正復不少一俟辦理得手卽可撥赴江南以應急需傳振邦督帶西安馬隊於何日啟程該鎮原帶官兵內尙能抽撥若干名均著附報具奏將此由六百里諭令知之○諭前據胡林翼奏貴州候補知府韓超素稱知兵訓練有方自苗匪滋事該員帶勇助剿見聞在台拱清江之間年餘無餉勸諭良苗供食恐其終必饑困坐失良將等語貴州候補知府韓超前於剿辦桐梓匪徒時帶勇打仗甚爲出力見在剿辦苗

匪據恆春等奏報亦屢敘其戰功其於軍務得力自屬可信當此軍務需人將才難得著恆春查明該員見在有無饑疲乏餉情事如果屬實亟應設法濟餉加以委任俾得奮勉立功以備干城之選將此諭令知之○乙卯諭內閣大學士賈禎在上書房宣力有年簡任綸扉甚屬勤慎見丁母憂著暫行開缺給假六箇月扶柩回籍並著加恩賞給廣儲司銀四百兩經理喪事假滿後卽行來京當差○諭軍機大臣等昨據恆春奏兵餉支絀請飭催撥等語貴州剿匪喫緊該督到黔後各路均獲勝仗而兵勇口糧欠發甚多斷難停兵待餉致有貽誤四川墊解粵餉銀十五萬兩僅據報解銀六萬五千兩其餘銀八萬五千兩尙未撥解著黃宗漢迅速籌款卽日派員解往貴州以備接濟毋得以無款可撥爲詞遷延干咎將此由四百里諭令知之○諭前因黃宗漢本年以來未見

奏報諭令該督明白回奏迄今月餘未據覆奏黃宗漢身任總督地方尋常事件應查者已屬不少況各省撥兵調餉關涉軍務者更當由驛馳奏乃半年以來並無奏報實堪詫異該督平日尙能認真辦事並非因循廢弛之人何以遲延貽誤若此是否該督近體患病精力不支抑或別有意見樂斌近在同城諒必知其情節著卽查明據實具奏毋得代爲掩飾將此由四百里諭令知之○是月免直隸東光縣被擾竈地舊欠額賦湖南永綏廳苗佃原貸穀石貨乾州等五廳苗疆丁佃籽種口糧賑山東鉅野縣災民一月口糧緩徵山西洪洞縣被擾災區舊欠額賦